

IPS UMP serah sumbangan raya untuk warga emas dan anak yatim



Bergambar kenangan bersama penghuni Rumah Kebajikan Orang-Orang Tua Seri Permai Taman Tas Kuantan.

RAMADAN telah berlalu, namun peluangmenziarahi warga emas di Rumah Kebajikan Orang-orang Tua Seri Permai Taman Tas Kuantan dan iftar bersama penghuni Rumah Anak Yatim dan Miskin Nur Iman menjadi kenangan buat pelajar pascasiswazah dalam dan luar negara sempena penganjuran program Ziarah dan Iftar oleh Persatuan Pascasiswazah **Universiti Malaysia Pahang (PGA UMP)** dan Institut Pengajian Siswazah (IPS).

Info Angka

- Melibatkan seramai **17 staf IPS, 20 pelajar pascasiswazah UMP**
- **18 orang** warga emas terima sumbangan

Menurut Dekan IPS, Profesor Datuk Dr. Hasnah Haron, program ini bertujuan mendidik hati kalangan staf mensyukuri nikmat kasih sayang dan kekeluargaan. "Program ini

juga dapat mengeratkan silaturahim antara staf, pelajar dan komuniti luar. Ini juga merupakan program CSR (*Corporate Social Responsibility*) yang julung kalinya dianjurkan pihak IPS sendiri. Sumbangan yang disampaikan berbentuk duit raya, kain pelikat, sejadah, biskut, sabun basuh, *hamper* dan beberapa keperluan harian lain hasil sumbangan dan komitmen pihak kami," katanya.

Selain itu, ia juga dapat merealisasikan agenda kesukarelawan dalam menjadikan UMP sebagai universiti komuniti dan mendukung aspirasi menjayakan inisiatif universiti ini dalam menjayakan program *MyGift UMP*.

Seramai 17 orang staf IPS dan 20 orang pelajar pascasiswazah UMP hadir menyampaikan sumbangan kepada 18 orang warga tua di sini.

Hadir sama, Timbalan Dekan IPS, Profesor Datin Dr. Mimi Sakinah Abd Munaim dan Timbalan Pengerusi 1 PGA, Amri Muaz Amrimuraz yang mewakili pelajar pascasiswazah.